

ՄԻՋՆԵՐԱԾՈՎՅԱՆ ԱՌԵՎՏՐԱԿԱՆ ՃԱՆԱՊԱՐԶԸ ԵՎ ՀԱՅ ՎԱՃԱՌԱԿԱՆՈՒԹՅՈՒՆ
ԱՌԵՎՏՐՈՒՐԸ ԱՐԵՎՄՏՅԱՆ ԵՎՐՈՊԱՅԻ ԵՐԿՐՆԵՐԻ ՀԵՏ XVІІ ԴԱՐՈՒՄ

Պատմ. դիտ. դպրոցի վ. Ա. ԲԱՅՐՈՒՐՅԱՆ

XV դարի կեսերից միջազգային առևտուրը ստացավ մինչ այդ աննախընթաց ներքին մղում: Եթե միջնադարյան առևտրի խնդիրն ու կոչումն էր լուրջ հասարակության բարձր խավերի պահանջարկի բավարարումը պերճանքի առարկաներով, ապա նշված ժամանակաշրջանից սկսած սկիզբ է դրվում միջազգային առևտրի այսպես կոչված «ժամանակակից» ձևին, որն առավելապես հետևանք էր եվրոպական տնտեսության բուռն զարգացման: Արևմուտքում արհեստներն ու գյուղատնտեսությունը արդեն անցել էին ապրանքային արտադրությանը, որը բնակչության արագ աճի պայմաններում անգամ ժողովրդական սպառման համար անուշադրելի էր ավելի մեծ քանակությամբ ապրանքներ: Եվրոպական զարգացող արդյունաբերությունը, բնականաբար, հարաճուն կերպով զգուշ էր հումքի պահանջ, որի մի զգալի մասը ապահովվում էր Արևելքից բերված հում մետաքսի, բամբակի, բուսական ներկերի, բուսական թերթի և բազմապիսի այլ հումքատեսակների հաշվին: Բացի այդ, եվրոպայում կապիտալիզմի բուռն զարգացումը վաճառահանման մշտական արտաքին շուկաներ ապահովելու պահանջ էր առաջադրում: Ահա այս հանգամանքներն էլ կապիտալիստական զարգացման ուղին թևակոխած երկրների անդրծովյան նվաճողականության սկզբնավորման պատճառ հանդիսացան:

Հայտնի է, որ դեռևս վաղ միջնադարից Արևմտյան Եվրոպայի երկրները Միջերկրական և Սև ծովերի վրայով առևտրական կապերի մեջ էին գտնվում Արևելքի երկրների հետ: Սակայն 1453 թ. թուրք-օսմանների կողմից Կ. Պոլիսը գրավելուց հետո այդ ուղին խափանվել էր: Փակվել էր նաև այսպես կոչված «մետաքսի ճանապարհը», առևտրական այն մեծ մայրուղին, որը Միջին Ասիայից և Իրանից, Հայաստանի վրայով տանում էր դեպի Սև ծովը: Դա այն ուղին էր, որի վրայով Եվրոպան ստանում էր մետաքս և մետաքսի հումք: «Մյուս ճանապարհը, որ կոչվում էր համեմունների ճանապարհ և զալիս էր ծովով Հնդկաստանից մինչև Եգիպտոս, վտանգվեց դարձյալ նույն թուրքերի տիրապետությամբ, որ հաստատվեց Եգիպտոսում»:

Այդ պատճառով վեներտիկը, որին պատկանում էր Մերձավոր ու Միջին Արևելքի, ինչպես նաև Հնդկաստանի ու Չինաստանի հետ առևտրի առաջնությունը, պարբերաբար պատերազմներ էր մղում օսմանյան Թուրքիայի դեմ, ապարդյուն ջանքեր թափելով Վերականգնելու Մերձավոր Արևելքում կորցրած իր կշիռը և կասեցնելու Միջերկրականի վրայով տեղի ունեցող առևտրի ճակատագրական վայրէջքը²:

Օսմանյան պետության զավթումները և Եվրոպան Արևելքի հետ կապող ուղու խափանումը արագացրին Հնդկաստան տանող ծովային ճանապարհի որոնումները: Աշխարհագրական մեծ հայտնագործությունները, որոնք թմինչ այդ չլսված զարկ տվին առևտրին, ծովագնացությանը, արդյունաբերությանը³, նշանավորում էին էական տեղաշարժեր նաև միջազգային առևտրի ու առևտրական գլխավոր մայրուղիների մեջ: Առևտրական ճանապարհները Միջ-

1 Լեո. Երկերի ժողովածու. հ. 3, Կրեան, 1969, էջ 8:

2 Աշ. Հովհաննիսյան. Դրվագներ հայ ազատագրական մտքի պատմության. գիրք Բ, Երևան, 1959, էջ 56, 57:

3 Կ. Մարքս և Ֆ. Էնգելս. Հետիւր երկեր, հ. 1, Երևան, 1972, էջ 139:

ևրկրական ծովից աստիճանաբար տեղափոխվեցին Ատլանտյան, Հնդկական և հետագայում նաև հաղաղ օվկիանոսները: Միջերկրական ծովը կորցրեց գլխավոր առևտրական ճանապարհի նշանակությունը, որը նա ուներ հին ժամանակներում և միջին դարերում:

Սակայն դա չի նշանակում, թե միջերկրածովյան առևտուրը իսպառ դադարեց: Նրա պահպանմանը առաջին հերթին նպաստում էր Օսմանյան կայսրության աճող շահագործվածությունը⁴: Պատահական չէ, որ թեև Ֆ. Էնգելսի ընդունմամբ թուրքերի առևտուր անելու մեթոդը կարավաններ թալանելն էր⁵, սակայն Թուրքիայի վրայով անցնող կարավանների շարժումը չէր դադարում նույնիսկ պատերազմների ժամանակ: Օսմանյան կայսրությունը ձգտում էր իր բաժինը ստանալ ոչ միայն իրանական հում մետաքսի առևտրից, այլև կենտրոնական Ասիայի, Հնդկաստանի ու Զինաստանի հետ իրագործվող առևտրափոխանակությունից⁶: Հենց այդ պատճառով թուրքերը մշտաբար սկսում էին դեպի արևմուտք տանող կարավանային ճանապարհների վրա:

Զպետք է անտեսել նաև այն իրողությունը, որ ցանկացած եվրոպական երկրից ճանապարհը Միջերկրական ծովով դեպի Մերձավոր Արևելք շատ ավելի կարճ էր ու անվտանգ, քան օվկիանոսի վրայով: Այդ է պատճառը, որ եվրոպական երկրները Մերձավոր ու Միջին Արևելքի հետ առևտուրն իրականացնում էին արևելյան միջերկրածովյան ավազանի առևտրական կենտրոններում:

XVI դարից սկսած նկատվում է հայ առևտրական բուրժուազիայի՝ խոջայական դասի վերելք: Միջազգային առևտրով զբաղվող հայ վաճառականները սկսում են հաջողությամբ մրցակցել եվրոպական հզոր առևտրական ընկերությունների ու առևտրական բուրժուազիայի հետ ոչ միայն այն պատճառով, որ կարավանային առևտրի մենաշնորհը պատկանում էր իրենց, այլ գլխավորապես այն պատճառով, որ բավարարվում էին համեմատաբար ցածր շահույթներով, որն անընդունելի էր եվրոպական վաճառականների համար: Բացի այդ, Հայաստանի յուրահատուկ աշխարհագրական դիրքը (Եվրոպայի և Ասիայի սահմանակցություն) և այն, որ նրա վրայով անցնում էին համաշխարհային նշանակություն ունեցող առևտրական ճանապարհները, նրան դարձնում էին կապող օղակ Արևելքի և Արևմուտքի ապրանքափոխանակության մեջ⁷:

Հայ առևտրական դասի վերելքին նշանակալիորեն նպաստում էր նաև մերձավորարևելյան երկու խոշորագույն պետությունների քաղաքականությունը: Այդ առթիվ Լեոն գրում է. «Պարսկաստանն ու Թուրքիան կապված են նոր ժամանակի Եվրոպայի հետ առևտրական սերտ շահերով, որոնց շնորհիվ նրանք կամա-ակամա բռնում են այնպիսի դիրք, որ նպաստում է այդ երկու պետությունների մեջ ապրող և վաճառականական ընդունակություններով աչքի ընկնող ազգերին իրենց ներքին կյանքի մեջ շարժումներ առաջացնելու»⁸: Ֆրանսիացի Տուրնեֆորտի վկայությամբ, օրինակ, Սեֆյան շահ Աբբաս I-ը հայերի նկատմամբ վարում էր կրոնական հանդուրժողականության քաղաքականություն, քանի որ նրանց քրիստոնյա լինելը հեշտացնում էր իրանի առևտրական հարաբերությունները եվրոպական երկրների հետ¹⁰:

⁴ Տե՛ս Վ. Ա. Բայբուրդյան. Հայերը և լեանտյան առևտուրը XVII դարում.— «Պատմա-բանասիրական հանդես», 1985, № 2, էջ 104:

⁵ Փ. Էնգելս. Турецкий вопрос.—К. Маркс и Ф. Энгельс. Соч., т. 9, М., 1957, с. 25.

⁶ G. Berchet. La Repubblica di Venezia e la Persia. Torino, 1865, p. 62.

⁷ H. Inalcik. The Ottoman Economic Mind and Aspects of the Ottoman Economy.—Studies in the Economic History of the Middle East. London, 1970, p. 210, 211.

⁸ К. . Papazian. Merchants from Ararat. New York, 1979; С. В. Тер-Аветисян. Город Джура. Тбилиси, 1937.

⁹ Լեոն. նշվ. աշխ., էջ 11:

¹⁰ Pitton de Tournefort. Relation d'un voyage du Levant. T. 2, Paris, 1718, p. 158.

Առևմտյան Եվրոպայում հայ վաճառականները բնավ նորելուկներ չէին: Դեռևս «Ժողովրդի Հայաստանը» կամ Կիլիկիայի հայկական թագավորությունը, որն ընդգրկվել էր համաշխարհային առևտրի մեջ, ի թիվս աֆրիկյան և ասիական երկրների, առևտրական լայն կապեր ուներ նաև եվրոպական տարբեր երկրների հետ¹¹: Եթե մինչ այդ Հայաստանը մասնակցում էր միայն միջառաքին ցամաքային կարավանային առևտրին, ապա այժմ նա ընդգրկվում է նաև ծովային առևտրի մեջ՝ դառնալով միջերկրածովյան ապրանքափոխանակության կարևոր գործոն¹²: Հայտնի է նույնիսկ, որ Կիլիկյան Հայաստանը ոռոջակի մասնակցություն է ունեցել միջազգային ծովային իրավունքի զարգացման գործում: Նա իր շոշափելի նպաստն է բերել նաև ազատ ծովագնացության սկզբունքի հաստատմանը:

Դեռևս Կիլիկիայի հայկական թագավորության առաջին թագալիր տիրակալ Լևոն II-ը (1198—1219) 1201 թ. առևտրական պայմանագրեր է կնքում Վենետիկի և Զենովայի քաղաք-պետությունների հետ, նրանց վաճառականներին հնարավորություն տալով ազատորեն առևտուր անել Կիլիկիայում և նրա վրայով՝ ողջ Արևելքի հետ¹³: Միջերկրական ծովի վրայով հայ վաճառականները ներս առևտրական հարաբերություններ ունեին նաև Ֆրանսիայի, Իսպանիայի, Հոլանդիայի, Հանզայի միության և այլ երկրների հետ¹⁴:

Կիլիկիայի հայկական պետականության անկումից հետո (1375 թ.) հայերը երբեք չդադարեցին Միջերկրական ծովի վրայով առևտուր անել եվրոպական երկրների հետ: Սակայն արդեն XVI դարում այդ առևտուրը նրանց թվում էր խիստ սահմանափակ և հայ առևտրական կապիտալի վերընթաց զարգացմանը փոքրիկ թափ նրանք փնտրում էին Արևմուտքի հետ առևտրի ավելի լայն ու հուսալի շուկաներ, քան դա կարող էին ապահովել արևելյան միջերկրածովյան նավահանգիստները:

Եվրոպական տերությունների առևտրական մրցակցությունից բացի Լևոնտում հայ վաճառականների գործունեությունը կաշկանդող պատճառներից մեկն էլ այդ պետությունների հյուպատոսությունների հարուցած արհեստական դժվարություններն էին: Կատարելով իրենց երկրների առևտրական ներկայացուցչությունների դեր, նրանք արևելյան, այդ թվում նաև հայ վաճառականներին փորձում էին թելադրել Եվրոպա ներմուծվող ապրանքների գները, հաշվառել թուրքերի էին ենթարկում նրանց և այլն: Այդ վիճակից ելք փնտրելով, մեծածախ առևտրով զբաղվող հայ խոջաները ձգտում էին իրենց ապրանքներն անմիջականորեն արտահանել Եվրոպա, որը նրանց խոստանում էր նաև ավելի բարձր շահույթներ:

XVI—XVII դդ. նավաշինության բուռն զարգացումը նպաստեց մերձավոր արևելյան ու եվրոպական նավահանգիստների միջև առևտրական կապերի ընդլայնմանը և բեռների ղանգվածային տեղափոխմանը: Վերականգնելով միջնադարյան հայ ծովային առևտրի ավանդույթները, վաճառական-խոջաները կտրում անցնում էին Միջերկրական ծովն ու Եվրոպա հասնում արևելյան (իրանական, թուրքական, միջինասիական, հնդկական, չինական և այլն) ապրանքների բազմապիսի ու հարուստ տեսականի¹⁵, որոնց մեջ առաջին տեղերից մեկը գրավում էր պարսկական հում մետաքսը, որի պահանջարկը մետաքսագործական արդյունաբերության բուռն զարգացման կապակցությամբ եվրոպական շուկաներում շեշտակիորեն աճել էր:

¹¹ Տե՛ս Ղ. Ալիշան. Միսական. Վենետիկ, 1893, էջ 401. Տե՛ս նաև V. Langlois. Le trésor des chartes d'Armenie. Venise, 1863, p. 107.

¹² R. S. Lopez. Medieval Trade in the Mediterranean World. New York, 1955, p. 50—52, 155, 156.

¹³ V. Langlois. Op. cit, p. 107.

¹⁴ Տե՛ս Ղ. Ալիշան. Միսական.

¹⁵ Ղ. Ալիշան. Հայ-Վենետ. Վենետիկ, 1896, էջ 503—504.

XVI—XVII դդ. Միջերկրական ծովի ավազանում առևտրի զարգացմանը զուգընթաց մեծանում էր նաև հայ նավատերերի թիվը: Սակայն բնականաբար նրանց տրամադրության տակ եղած նավերի թիվը չէր կարող այնքան մեծաքանակ լինել, որ ամբողջապես ապահովեր առևտրական բեռնափոխադրումների ողջ պահանջարկը: Հետևապես հայ վաճառականները ստիպված էին լայնորեն օգտվել եվրոպական տերութիւնների և առաջին հերթին Անգլիայի, Ֆրանսիայի և Հոլանդիայի առևտրական նավատորմիղների ծառայություններից, մանավանդ որ դա կարող էր ապահովել ապրանքների տեղափոխման ավելի հուսալի երաշխիքներ: Հիշենք, որ XVI—XVII դդ. ծովահենությունը անուշադան էր ծովային առևտրից: Հատկապես Միջերկրական ծովում ծովահենությունն ընդունել էր աննախընթաց չափեր¹⁶: Պետականությունից ու պետական հովանավորությունից զուրկ հայ վաճառականներն ավելի հաճախակի էին դառնում ծովահենության զոհեր¹⁷: Մեզ տեղեկություն է հասել, օրինակ, այն մասին, որ Ֆրանսիացի ծովահեն Անրի դ'Անգլյուր դե Բուրլեմոնը 1649 թ. Միջերկրական ծովում զավթել է հայ նավատեր Անտոն Պողոսին պատկանող «Հալաստանի վաճառական» («Մերկանտե Արմենո») կռված նավը¹⁸: Նման հարձակումների հետևանքով ունեղրկվում ու սնանկանում էին ոչ միայն առանձին վաճառականներ, այլև ամբողջ առևտրական տներ:

Տվյալներ կան նաև այն մասին, որ եվրոպական տերությունները որոշակի վարձատրության դիմաց հայ նավատերերի նավերին ուղեկցելու համար տրամադրում էին ռազմանավեր: Ընդ որում խոջաները ավելի հաճախակի օգտվում էին հոլանդական մարտանավերի նմանօրինակ ծառայություններից¹⁹:

Եթե մինչև XVII դարի առաջին կեսը Արևելքի և Արևմուտքի միջև միջազգային առևտրով զբաղվող հայ վաճառականների առևտրական գործառնությունների մեծագույն մասը կատարվում էր Լեանտի առևտրական կենտրոններում, ապա դարի երկրորդ կեսին որոշակի միտում էր նկատվում առևտուրը եվրոպական շուկաներ տեղափոխելու և տեղական առևտրական բուրժուազիայի հետ անմիջական կապերի մեջ մտնելու ուղղությամբ: Դա հատկապես ավելի շեշտված բնույթ էր ընդունեց այն բանից հետո, երբ 1676 թ. ռուսական կառավարությունը վերականգնեց հայ վաճառականների իրավունքը Ռուսաստանի վրայով Արևմտյան Եվրոպայի հետ առևտուր անելու վերաբերյալ²⁰: Վկայելով այդ մասին, Ֆրանսիացի Տուրնեֆորը գրում էր. «Նրանք (հայ վաճառականները—Վ. Բ.) գալիս են Պարսկաստանի խորքերից և հաստատվում են Լիվոնոյում: Ոչ շատ վաղուց հիմնավորվեցին Մարսելում: Որքան մարդ է նրանցից գտնվում Հոլանդիայում և Անգլիայում»²¹:

Եվրոպական հզոր առևտրական ընկերությունների կողմից հարուցվող մրցակցային դաժան պայքարին դիմանալու համար հայ վաճառականները ստիպված էին դրսևորել մեծ ճկունություն: Նրանք պետք է յուրացնեին եվրոպայում գոյություն ունեցող առևտրի ձևերը, հարկադրված էին նաև սովորել լեզուներ, ուսումնասիրել տեղական կենցաղն ու սովորույթները, բանկային ու վարկատվական փոխառությունների ձևերը, ծանոթանալ եվրոպայի շուկայական

¹⁶ G. Clark. The Barbary Corsair in the 17 century.—Cambridge Historical Journal, V. 8, 1944, no. 1, p. 26.

¹⁷ Տե՛ս, օրինակ, Ջաքարիա Ադունցի. Օրագրություն. Երևան, 1938, էջ 51:

¹⁸ Ю. Г. Барсегов. Дело королевского пирата Кидда.—Историко-филологический журнал, 1986, № 3, с. 189.

¹⁹ Տե՛ս Ա. Մարտիան. Հոլանդիան և հայերը ԺԶ—ԺԹ դարերում. Վիեննա, 1926, էջ 56, 57:

²⁰ В. А. Байбуртян. Армянская колония Новой Джульфы (роль Новой Джульфы в ирано-европейских политических и экономических связях). Ереван, 1969, с. 109.

²¹ Pitton de Tournefort. Op. cit., Lettre 20, p. 158.

ևոնյուկտուրային, այդ շուկաներում արևելյան ապրանքների պահանջարկին, համագործակցության մեջ մտնել եվրոպական առևտրական ընկերությունների ու վարկավորող հաստատությունների հետ և, վերջապես, կապեր հաստատել եվրոպական պետությունների կառավարող շրջանների հետ: Հայտնի է, օրինակ, որ 1696 թ. Ինովկենտիոս XII պապը ջուղայեցի հարուստ վաճառականական ընտանիքներից մեկին՝ Շահրիմանյաններին շնորհեց Հռոմի քաղաքացու պատվավոր կոչում, որը նրանց իրավունք էր տալիս ազատ առևտուր անելու Հռոմում և Անկոնայում²², Իսկ 1699 թ. Ավստրիայի կայսր Լեոպոլդ I Հաբսբուրգը Շահրիմանյան ընտանիքին շնորհեց մի պարզևագիր, որով նրանց ճանաչեց որպես Ավստրիայի ազնվականության դասակից ու հավասար և նրանց ողջ գերդաստանին շնորհեց կոմսության տիտղոս²³:

Իրանում և Թուրքիայում անձի և գույքի անապահովության պայմաններում հայ վաճառականները սովորաբար իրենց դրամները պահում էին եվրոպական բանկերում, որը հեշտացնում էր նրանց առևտրական գործառնությունների ծավալումը: Հայտնի է, օրինակ, որ հայ վաճառականները դրամական խոշոր ավանդներ ունեին Վենետիկի «Banco Dolfin» հայտնի դրամատանը²⁴: Իսկ Մարգար Շահրիմանյանը նույն քաղաքի «Ս. Մարկոս» կոչված բանկում ուներ 700 հազար դուկատ գումարով ավանդ²⁵: Առհասարակ Շահրիմանյան ընտանիքը Եվրոպա էր տեղափոխել երկու միլիոն դուկատ²⁶:

Եվրոպայում հայ վաճառականների վաղեմի առևտրական պարտնյորներ են հանդիսացել Իտալիայի քաղաք-հանրապետությունները և առաջին հերթին՝ Վենետիկի հանրապետությունը: XVII դարը հանդիսանում էր իտալական պետությունների տնտեսության ու քաղաքական ազդեցության անկման դարաշրջան: Լեանտի հետ միջնորդ առևտուրը անշեղորեն կրճատվում էր և վաճառականների մեծ մասը վեր էր ածվում հողագործների: Դեռևս XVI դարում Թուրքերը Վենետիկից զսվթեցին նրա հունական տիրույթները, որը հանգեցրեց Արևելքի հետ նրա առևտրի կտրուկ կրճատմանը: Այս պարագաներում Վենետիկի համար կենսական անհրաժեշտություն էր հայ վաճառականների հետ համագործակցությունը, որը նրան հնարավորություն էր տալիս ձեռք բերել արևելյան ապրանքներ և հումք (հատկապես հում մետաքս), ինչպես նաև ինչ-որ չափով դիմակայել իր հզոր առևտրական ախոյանների՝ Անգլիայի, Ֆրանսիայի և Հոլանդիայի մրցակցությանը²⁷: Անգլիացիները ստիպված էին խոստովանել, որ Վենետիկցիների և հայերի միջև առևտուրը ամբողջապես խափանելը անհնարին է²⁸:

Վենետիկի հանրապետության սենատը, ելնելով վերոհիշյալ նկատառումներից, բազմաթիվ արտոնություններ և իրավունքներ էր շնորհում հայ վաճառականներին, պարբերաբար իջեցնելով նաև նրանցից գանձվող մաքսատուրքերը²⁹: 1640 թ. ապրիլի 24-ի սենատի նիստի արձանագրության մեջ, օրինակ,

²² Մ. Ուղուրլյան. Պատմություն հայոց գաղթականության և շինության եկեղեցվո նոցա ի իվոռնո քաղաքի. Վենետիկ, 1891, էջ 211:

²³ Նույն տեղում, էջ 399—307, Տե՛ս նաև A Chronicle of the Carmelites in Persia and the Papal Mission of the 17 and 18 centuries. Vol. I, London, 1939, p. 485. vol. 2, p. 1358.

²⁴ Ղ. Ալիշան. Հայ-Վենետ, էջ 371:

²⁵ Հ. Տեր-Հովհաննյան. Պատմություն Նոր Զուղայի. հ. Ա, Նոր Զուղա, 1880, էջ 110—115:

²⁶ Մ. Ուղուրլյան. նշվ. աշխ., էջ 207:

²⁷ Э. Шахмалиев. Об англо-испанских противоречиях на Переднем Востоке в 80—90-х гг. XVI и первой четверти XVII в.—Ученые записки Азербайджанского Гос. университета, гуманитарная серия, 1958, № 1, с. 124.

²⁸ Հ. Հակոբյան. Ուղեգրություններ. հ. Ա, Երևան, 1932, էջ 411:

²⁹ G. Berchet. Op. cit, p. 67. Ղ. Ալիշան. Հայ-Վենետ, էջ 431, 464—465:

ասվում էր, որ Քայդ ազգին հովանավորելը մեծապես օգտավետ է մեզ, քանի որ հայ վաճառականները զբաղվում են մեծ առևտրով և Վենետիկ են ներմուծում ամենաբազմապիսի արևելյան ապրանքներ, որոնց մեջ ամենաարժեքավորը հում մետաքսն է»³⁰։ Մեկ այլ փաստաթղթում, որը թվագրված է 1651 թ., վենետիկյան իշխանությունները հայտարարում էին. «Ներկայումս արժե միայն խրախուսել հայերի առևտուրը, նրանց տրամադրելով ամենալայն առանձնաշնորհումներ»³¹։ Վենետիկի արքունի դիվանի այլևայլ հիշատակությունների մեջ ծերակույտի կողմից հայ ազգը անվանվում է «բարյացապաշտ», «սիրելի», «հաճոյական», «օգտակար», «միշտ շահավոր» և այլն։ Ի նշան համակրության, Վենետիկի ծերակույտի կողմից շնորհված էր հրաման, որ հայերը համարձակ կարող են իրենց ապրանքները վաճառել Ս. Մարկոսի հրապարակում, առանց որևէ հարկ վճարելու³²։

Մինչև իրանահայ վաճառականների անմիջական այցելությունները Վենետիկ, «Ադրիատիկի մարգարիտը» կոչված այս վաճառաշահ քաղաքի հետ աշխույժ առևտուր ունեին Թուրքիայի և Արևմտյան Հայաստանի հայ խոշոր վաճառական-խոջաները։ Սակայն ամենակարճ ժամկետում արևելահայ վաճառականները, հատկապես ջուղայեցիները, կարողացան Վենետիկի հետ կատարվող առևտրի մեծագույն մասը կենտրոնացնել իրենց ձեռքում և մրցակցային պայքարում կամ դուրս մղել իրենց արևմտահայ մրցակիցներին և կամ ստիպել նրանց շահավետ պայմաններով համագործակցել իրենց հետ։

XVII դարի սկզբներից հայերի առևտուրը Վենետիկի հետ իսկական ծաղկում է ապրել։ Դա նաև տեղի գաղթօջախի մեծացման պատճառ է հանդիսացել։ XVI դարի երկրորդ կեսից ծայր է առնում հայ բնակչության նոր հոսանք դեպի Իտալիա։ Դրա պատճառը ոչ միայն Թուրք-իրանական պատերազմներն էին, Հայաստանի անապահով վիճակը, տնտեսական կյանքի լճացումը, կողոպուտն ու գերեվարությունը, որոնք ստիպում էին հայ զանգվածներին լքել իրենց հայրենիքը և գաղթել ավելի ապահով վայրեր, այլև հայ առևտրական բուրժուազիայի արագ ձևավորումը, որն անմիջապես նետվում էր նոր շուկաներ որոնելու բուռն հորձանուտի մեջ։ Վենետիկում այնքան մեծ է եղել ջուղայեցի վաճառականների թիվը, որ Ս. Մարիամ Ֆորմոզայի եկեղեցու կից փողոցը կոչվել է «Ջուղայի փողոց»³³։ Սիմեոն Լեհացին իր ուղեգրության մեջ (1612 թ.) Վենետիկում հիշում է հայկական քարաշեն եկեղեցի՝ իր հյուրանոցներում և հարակից այլ շենքերում³⁴։ Այդ քաղաքում իրենց ներկայացուցիչներն են ունեցել Իրանի, Թուրքիայի, Ֆրանսիայի, Լեհաստանի, Ռուսաստանի և այլ երկրների հայ խոշոր վաճառականական տները։

Վենետիկի հանրապետության և հայ խոջաների միջև առևտուրը առանձնակի վերելք էր ապրում պարբերաբար բռնկվող Թուրք-վենետիկյան պատերազմների, մասնավորապես Կանդիայի 25-ամյա պատերազմի ժամանակ (1645—1669 թթ.)։ Ընդ որում հայ վաճառականների քաղաքական համակրանքը մշտապես եղել է Թուրքիայի հակառակորդի կողմը։ Հայտնի է օրինակ, որ Մարգար Շահրիմանյանը 1693 թ. 200 000 դուկատ գումարով փոխառություն էր հատկացրել Վենետիկի հանրապետությանը Թուրքերի դեմ պատերազմ մղելու համար³⁵։

Իտալական քաղաքներից Ջենովան ևս մինչև XVII դարի կեսերը կարևոր տեղ էր գրավում Արևելքի ու Եվրոպայի միջև միջնորդ առևտրում։ Հանդիսանալով Վենետիկի մրցակիցը, նա ամեն կերպ աշխատում էր հայ վաճառականներին գրավել իր կողմը, նրանց տրամադրելով լայն իրավունքներ և արտոնու-

³⁰ Մ. Ուղուրլյան. նշվ. աշխ., էջ 215։

³¹ Դ. Ալիշան. Սիսական, էջ 447։

³² Մ. Ուղուրլյան. նշվ. աշխ., էջ 216։

³³ Նույն տեղում, էջ 214։

³⁴ Սիմեոն Դպրի 'Լեհացույ Ուղեգրութիւն.—«Հանդես ամսօրյա», 1934, № 3—4։

³⁵ A Chronicle..., vol. 1, p. 438.

թվունները 1623 թ. Զենովան նույնիսկ ընդունեց հայ վաճառականների առաջարկը՝ համատեղ կազմակերպել «Արևելյան Հնդկաստանի առևտրական ընկերություն»՝ Հնդկաստանի և Իրանի հետ առևտուր անելու և իրանական հում մետաքսը անմիջականորեն Զենովա ներմուծելու համար³⁶։

Հայ խոջաները աչքի ընկնող առևտուր ունեին նաև Իտալիայի Լիվոռնո նավահանգստային քաղաքի հետ։ XV դարի կեսից Լիվոռնոյում ստուգապես կար հայ գաղթականություն, որի մեծ մասը կազմում էին վաճառականները։ Հայերը առաջիններից էին, որ սկսել էին արևելյան ապրանքներ ներմուծել Տոսկանա³⁷։ Լիվոռնոյի առևտրական նշանակությունը բարձրացնելու նպատակով Տոսկանայի մեծ հերցոգ Ֆերդինանդո I Անդրիլին 1593 թ. հունիսի 10-ին հրապարակում է մի հրամանագիր, որով նա բոլոր ազգերի վաճառականներին, առ թիվում նաև հայերին, հրավիրում էր «առանձին կամ ընտանյոք» հիմնավորվել Լիվոռնոյում կամ Պիզայում և զբաղվել Արևելքի հետ առևտրով։ 40 կետից բաղկացած հիշյալ հրամանագրով Ֆերդինանդո I-ը Լիվոռնո և կողմնակից վաճառականներին շնորհում էր զանազան արտոնություններ, առանձնապես հումքեր, ազատություններ, ապահովություններ, ազատ առևտրի իրավունք, «ապահովություն շահեալ գումարած վճարման»։ Ներքին և թուրքական գործերի վանքից, անկախություն ըստ իմիջի դատաւորաց հրաման կազմելու առանձին հասարակությունս, և յերթևեկութեան վաճառականաց ուղևորական նպաստներ, և այլն և այլն»³⁸։

Այս արտոնությունները հատկացնելուց հետո «յայնժամ բազմացան վաճառականք և կարաւանք Հայոց՝ յարևելքից Ասիոյ և ի Կիլանայ, ի Նուխոյ, ի Գանձակայ, և այլն, բառնալ մթերս անբաւ զուտ և անզուտ մետաքսի ալլ և ալլ որակաւ և տեսակաւ»³⁹։

1671 թ. Լիվոռնոյում իրանական ավագ հյուպատոսի պաշտոն էր վարում Պետրոս անունով դափանցի մի հայ⁴⁰։ Սրան հաջորդեցին Գրիգոր Միրիմանը (Գրիգոր Գերաք) և իր ժառանգները, որոնք Կողմաս III-ի ժամանակ ճանաչվեցին իշխանազուն տոհմ։ Նրանք առևտրական կապեր ունեին Մեդիչիների հետ։ Մեզ է հասել երկու մեղալ Գրիգոր Գերաքի դիմաքանդակով⁴¹։

1683 թ. հունիսի 17-ին հայ անվանի վաճառականների մի մեծ խումբ ստորագրում է «Առաջին դաշնագրություն հայոցը» Լիվոռնոյում և կնքում կառուցելու մասին ավասն ազգին մերոյ⁴²։

Այնքան շատ ջուղայեցիներ են հաստատված եղել Վենետիկ, Զենովա և Լիվոռնո քաղաքներում, որ Ստեփանոս արքեպիսկոպոս Զուղայեցի իր 1688 թ. մի գրությունը վերնագրել է՝ «Գիր օրհնութեան աստուածաշէն քաղաքացն Վենետիկ, Արևելոնոյ և Զենովայ եղեալ քրիստոսասէր և բարեպաշտօն ջուղայեցի վաճառականաց, սիրելի և հարազատ եղբարց»⁴³։ Պատահական չէ, որ հենց հայ վաճառականների դրամական հատկացումների շնորհիվ 1643—1702 թթ. ընթացքում Լիվոռնոն ակնառու տեղ է գրավել նաև հայ գրատպության մեջ⁴⁴։

Իտալիայում հայ վաճառականները խոշոր առևտուր ունեին նաև Լուկկայի քաղաքային հանրապետության, Ֆերրարայի և Պյաչենցայի հերցոգությունների, Ֆաենցա, Անկոնա, Բոլոնիա, Պավի, Ֆարիանա, Ֆորլի, Պիրուտ, Հոտմ, Նեպոլի, Միլան, Ֆլորենցիա, Պադուա, Տուրին, Բավիա, Պիստոյա, Սիննա...

36 Ղ. Ալիշան. Սիսական, էջ 450 (ընկերությունը գոյություն ունեցավ մինչև XVI դարի կեսը, որից հետո վերացվեց)։

37 Մ. Ուղուրյան. նշվ. աշխ., էջ 45։

38 Նույն տեղում, էջ 253—255։

39 Ղ. Ալիշան. Սիսական, էջ 455։

40 «Հանդես ամսօրյա», 1887, էջ 170 և հտ., էջ 194 և հտ.։

41 «Անահիտ», 1939, էջ 57 և հտ.։

42 Մ. Ուղուրյան. նշվ. աշխ., էջ 256—257։

43 Ա. Ալպոյաճյան. Պատմություն հայ գաղթականության. Կ. Պ., Կապիթի, 1955, էջ 450։

44 «Բաղմավեպ», 1937, էջ 229 և հտ.։

Վիտերբո, Էմիլիա և այլ քաղաքների հետ⁴⁵։ Մեծ թվով հայեր էին հաստատվել Խավեննա քաղաքին կից նավահանգստում, այդ պատճառով հաճախ Ռավեննան անվանվել է նաև «Արմենիա»⁴⁶։

Վերին աստիճանի ծավալում էր նաև հայ վաճառականների առևտուրը Ֆրանսիայի հետ։ Ժիշտ է, այն հիմնականում կատարվում էր Լևանտում, որտեղ Ֆրանսիան, հենվելով XVI դարում օսմանյան սուլթաններից ստացած կապիտուլյացիաների վրա, ձեռք էր բերել կայուն դիրքեր⁴⁷, սակայն հայ վաճառականները Միջերկրական ծովով այցելում էին նաև բուն Ֆրանսիա։ Առհասարակ պետք է նշել, որ Ֆրանսիան մեծ հաջողությամբ կարողացավ օգտագործել միջերկրածովյան առևտրի ավանդույթները, իսկ Մարսելը հանդիսացավ դասական միջնադարի իտալական քաղաքների լեանտյան առևտրի ժառանգորդը⁴⁸։ Մարսելի վրայով իրականացվում էր նաև առևտուրը Իսպանիայի, Իտալիայի և Աֆրիկայի հետ։

XVII դարում առևտրական խոշոր նշանակություն ձեռք բերեցին նաև Ատլանտյան ծովափի առևտրական քաղաքները, հատկապես Նանտը, Բորդոն, Լա-Ռոշելը, Դյուպայը և այլն։ Իսկ Ֆրանցիսկ I-ի ժամանակ հիմնադրված Հավրը ավելի ուշ դարձավ Ֆրանսիայի խոշորագույն նավահանգիստը⁴⁹։

XVII դարում օվկիանոսային ճանապարհների վրա Ֆրանսիան չէր կարող հանդես գալ որպես Անգլիայի մրցակից, իսկ ցամաքային կարավանային առևտրով ֆրանսիական վաճառականները առհասարակ չէին զբաղվում։ Հետևաբար ֆրանսիական առևտրական բուրժուազիայի համար ևս կարևորագույն նշանակություն էր ձեռք բերում առևտրական համագործակցությունը հայ վաճառականների հետ։

Տեղեկություններ կան այն մասին, որ XVII դարի սկզբին հայ խոջաները փորձում էին ֆրանսիական թագավորից ձեռք բերել Ֆրանսիայի բոլոր մեծ քաղաքներում հաստատվելու իրավունք⁵⁰։ Ստանալով այդպիսի իրավունքներ⁵¹, կարճ ժամանակամիջոցի ընթացքում նրանք ծավալում են այն աստիճանի լայն առևտուր, որ դառնում են ֆրանսիացի վաճառականների լուրջ մրցակիցներ։ Այդ պատճառով 1622, 1634 և 1650 թթ. ընդունած հրամանագրերով ֆրանսիական իշխանությունները պարբերաբար սկսում են սահմանափակել իրենց առևտրական ախոյանների գործունեությունը։ Բանը հասնում է նույնիսկ նրան, որ Մարսել և Տուլոն նավահանգիստները փակվում են հայ վաճառականների առջև⁵²։ Ֆրանսիական իշխանությունների այդ քաղաքականությունն անպատակներից մեկն էր նաև Թուրքիային տնտեսական հարված հասցնելը, որովհետև Լյուդովիկոս XIV-ի արտաքին քաղաքականության կարևորագույն խնդիրներից մեկն էր Միջերկրական ծովը փակել թուրքերի առջև⁵³։ Կարգինալ Զուլիո Մազարինիի կառավարման շրջանը նշանավորվեց Լյուդովիկոս XIV-ի կառավարության կողմից նոր քաղաքական գծի մշակմամբ,

⁴⁵ Ղ. Ալիշան. Սիսական, էջ 456։

⁴⁶ Մ. Ուղղորդյան. նշվ. աշխ., էջ 228։

⁴⁷ Paul Masson. Histoire du commerce français dans le Levant ou 17 siecle. Paris, 1890.

⁴⁸ G. Tongas. Les relations de la France avec l'Empire Ottoman durant la Première moitié du 17 siecle. Toulouse, 1942, p. 193.

⁴⁹ Ф. Я. Полянский. Экономическая история зарубежных стран (эпоха феодализма). М., 1954, с. 440.

⁵⁰ Fr. Macler. Notes de manuscrits arméniens ou relatifs aux Arméniens, vus dans quelques bibliothèques de la péninsule ibérique et du sud-est de la France.—Revue des Etudes Armeniennes, t. 2, fasc. 1, fol. 25, Paris, 1922.

⁵¹ Ղ. Ալիշան. Սիսական, էջ 457։

⁵² Fr. Macler. Op. cit.

⁵³ H. Missac. Le Père Ottoman (1644—1676).—Revue d'Histoire Diplomatique. Paris, 17e année, 1903, p. 365.

որն ընթանում էր Ֆրանսիական բուրժուազիայի դիրքերի ամրապնդման կարգախոսի ներքո: Այդ քաղաքականության բաղկացուցիչ մասերից մեկն էր դիտվում նաև արևելյան վաճառականների նկատմամբ գոյություն ունեցող սահմանափակումների վերացումը⁵⁴: Այս շրջադարձը մասամբ պայմանավորված էր նրանով, որ Ֆրանսիայի մրցակիցները, մասնավորապես Հոլանդիան, ավելի ու ավելի էին իրենց կողմը գրավում արևելյան վաճառականների առևտուրը, որի հետևանքով Ֆրանսիայի արտադրությանն ու առևտրին հասցվում էին խոշոր վնասներ: Անտվերպենն, օրինակ, կարողացավ զավթել հում մետաքսի առևտուրը՝ Ֆրանսիական մետաքսի մանուֆակտուրաները համարյա զրկելով հումքից⁵⁵:

Այս անցանկալի իրողությունը հարկադրեց Ֆրանսիային արևելյան վաճառականների նկատմամբ որդեգրած քաղաքականության բնագավառում կատարել կտրուկ շրջադարձ: Կրկին խրախուսվեց նրանց առևտուրը Մարսելի հետ⁵⁶: Այդ քաղաքականությունը առանձնակի հետևողականությամբ իրագործվեց Կոլբերի կողմից, որը եռանդուն կերպով աշխատում էր, որ երկիրը իր մասնակցությունը բերի համաշխարհային առևտրին, զարկ տա արդյունաբերությանը և պայքարի մեջ մտնի վաճառականման շրջանների համար⁵⁷: Այդ առումով հատկապես կարևոր նշանակություն ունեցավ 1667 թ. Կոլբերի կողմից կազմած սակացուցակը («տարիֆ»), որն իրենից ներկայացնում էր ներմուծվող հումքի նկատմամբ հովանավորողական մաքսերի մի ամբողջ համակարգ⁵⁸: Արևելյան առևտրի բնագավառում Հոլանդիայի և Անգլիայի դեմ հաջողությամբ մրցակցելու համար 1664 թ. Կոլբերը ստեղծեց «Ֆրանսիական արևելա-հնդկական ընկերությունը», իսկ 1669 թ. կազմակերպեց «Լևանտյան ընկերությունը»⁵⁹: Այնուհետև 1669 թ. Մարսելը հայտարարվեց բաց նավահանգիստ («պորտո ֆրանկո»)՝⁶⁰: Այդ առթիվ Լյուդովիկոս XIV-ի և Կոլբերի հրապարակած էդիկտում ասվում էր, որ Մարսել եկող և այնտեղից մեկնող բոլոր նավերը ազատվում են ամեն տեսակի հարկերից և որ այդ նավահանգիստը այսուհետև հայտարարվում է ազատ ու մատչելի բոլոր վաճառականների ու բոլոր տեսակի ապրանքների համար⁶¹:

Այդ քայլի կարևորագույն դրդապատճառներից մեկը կայանում էր նրանում, որ Ֆրանսիայում եկել էին այն համոզման, որ իրենց արևելյան, մասնավորապես իրանական առևտրի հաջողությունը բացառապես կախված է հայ վաճառականների համագործակցությունից ու նրանց բարի կամեցողությունից⁶²: Այսպիսով, հայ վաճառականների առջև կրկին բացվեց Լևանտ-Ֆրանսիա առևտրական երթուղին: Կոլբերը հայերին հատկացրեց այնպիսի արտոնություններ, որպիսիք «չունեն արևելյան ազգերից և ոչ մեկը»⁶³: Չնա-

⁵⁴ A. Aubery. Histoire du cardinal Mazarin. T. 3, Amsterdam, 1718, p. 333—339.

⁵⁵ E. Lavisse. Histoire de France depuis les origines jusqu'à la Révolution. V. 5. Paris. 1911, 1er part, p. 270.

⁵⁶ H. Samuëlian. Les Arméniens, en France depuis les origines, jusqu'à nos jours, le Foyer 3-e année, no. 35, Paris, 1er Avril, 1930.

⁵⁷ Н. Н. Розенталь. История Европы в эпоху торгового капитализма. Л., 1927, с. 125.

⁵⁸ Р. Ю. Виппер. Четыре века европейской истории, М., 1924, с. 81, 82.

⁵⁹ N. Roca. La France en Orient depuis les rois francs jusqu'à nos jours: „Aperçu historique“, Paris, Chalamel, 1876, p. 103.

⁶⁰ P. Clement. Histoire de la vie et de l'administration de Colbert. Paris, 1846 p. 352.

⁶¹ Recueil des réglemens généraux et particuliers concernant les manufacture, et fabriques du Royaume. T. 1, Paris, 1730, p. 183—189.

⁶² Raphaël du Mans. Etat de la Perse en 1660. Paris, 1690, appendice, XLV.

⁶³ Pouillet. Nouvelles relations du Levant. Paris, 1668, p. 436.

յա: նրան, որ նա իրականացնում էր մերկանտիլիզմի, պրոտեկցիոնիզմի և ակ-
տիվ առևտրական հաշվեկշռի քաղաքականություն, սակայն հայ վաճառա-
կանների հետ փոխհարաբերություններում որպես կանոն ֆրանսիական մաք-
սային իշխանությունները հետամուտ չէին լինում այդ սկզբունքների անշեղ
կենսագործմանը: Բացի այդ, կարգադրվեց հայ վաճառականների կողմից
սերված ապրանքների արժեքը վճարել միայն դրամով, այն դեպքում, երբ
հունդացիներն ու անգլիացիները գերադասում էին վճարումները կատարել
ապրանքների փոխանակության ձևով կամ անկանխիկ հաշվարկով, որը, բնա-
կանաբար, ձեռնտու չէր հայերին: Հենց այդ պատճառով էլ վերջիններս սկսե-
ցին նախապատվություն տալ ֆրանսիացիներին⁶⁴:

Օգտվելով այս շեշտված բարյացակամ վերաբերմունքից, 1687 թ. հայ
սոցալաները թույլտվություն խնդրեցին Մարսելում և Բորդոյում բաց անելու սե-
փական առևտրական գրասենյակներ: Ավելին, նրանք խնդրագիր ներկայաց-
րին Ֆրանսիայում «Հնդկական ընկերություն» հիմնելու համար, որը մասնա-
գիտանալու էր Հնդկաստանի, Չինաստանի, մերձավորարևելյան երկրների և
Լեանտի հետ առևտրում: Խեղճ ֆրանսիական վաճառականների ճնշման ներքո
Լյուդովիկոս XIV-ը մերժեց այդ խնդրանքը⁶⁵, սակայն որպես փոխհատուցում
հայերին թույլատրվեց Ֆրանսիայի հարավային նավահանգիստներում բաց
անել առևտրական տներ⁶⁶:

Կոլբերը սկսեց խրախուսել նաև Մարսելի հայ գրատպությունը, նկատի
ռմունքով, որ նախ դա կնպաստեր հայ վաճառականների առևտրի աշխու-
յացմանը այդ քաղաքի հետ և ապա՝ ֆրանսիական գանձարանը նշանակալից
նկատմունքներ կստանար գրքի առևտրից, որովհետև հայկական գրքերը սովո-
րաբար լավ սպառում էին գտնում Արևելքում⁶⁷: Օգտվելով ընձեռնված հնա-
րավորություններից, 1669 թ. մայիսի 6-ին Ոսկան Երևանցին լատիներեն
լեզվով մի «աղերսանց» թուղթ է հղում Լյուդովիկոս XIV-ին, որով խնդրում
էր բարեհաճել ընդունել 1666 թ. Ամստերդամում իր հրատարակած հայկական
Աստվածաշնչի մի օրինակ: Թագավորից ստացված 1669 թ. օգոստոսի 11-ի
պատասխան նամակում հայտնվում էր, որ Երևանցուն շնորհված է Մարսելում,
Լիոնում կամ տերություն մեկ ուրիշ քաղաքում տպարան հիմնադրելու և հա-
յերեն լեզվով ամեն տեսակի գրքեր հրատարակելու իրավունք⁶⁸: Վերոհիշյալ
միջոցառումները առաջ էին բերում ֆրանսիական վաճառականների կատաղի
հակազդեցությունը, որովհետև նրանք նախկինի պես հայերին համարում էին
իրենց մրցակիցներ: Ֆրանսիական գործարար շրջանները նույնիսկ շտրպեյին
դիմել հռոմեական հավատաքննության օգնությանը, որի միջամտության հե-
տևանքով տաս տարի գործելուց հետո 1683 թ. Մարսելի տպարանը փակվեց:

Ֆրանսիայի առևտրական բուրժուազիայի այդ պայքարը երկրի ազգային
շահերի համար այն աստիճանի արտառոց էր, որ Փարիզը հրապարակորեն
հանդես եկավ Մարսելի դեմ, որի վաճառականական դասը առավել անհաշտ
դիրքավորում էր որդեգրել հայ խոջայության նկատմամբ: Հայերի պաշտպա-
նություն օգտին հանդես եկան նաև փարիզյան հայտնի անձնավորություններ:
Ի վերջո, գործին միջամտեց նաև թագավորը՝ Լյուդովիկոս XIV-ը: 1683 թ.
հունվարի 3-ին և փետրվարի 5-ին Մարսելի իր պաշտոնակատար Մորանին
նա ուղարկեց երկու հրամանագրեր տպարանի իրավունքները լիովին վերա-
կանգնելու մասին⁶⁹:

⁶⁴ Ա. Ալպայաճյան. նշվ. աշխ., էջ 175:

⁶⁵ Հայկ. Տեք-Աստվածատրյանց. Հայ վաճառականությունը Ռուսիայում. Պարիս, 1908, էջ 47:

⁶⁶ Ա. Ալպայաճյան. նշվ. աշխ., էջ 200:

⁶⁷ Fr. Mac Ier. Mosaïques orientales. Paris, 1907, p. 62.

⁶⁸ Հայկական տպարանի Մարսել. «Բազմավեպ», 1891, հ. 108, հունիս, էջ 163:

⁶⁹ 2. Անասյան. XVII դ. ազատագրական շարժումներն Արևմտյան Հայաստանում,
Երևան, 1961, էջ 190—193:

Հայ-ֆրանսիական առևտրական հարաբերությունները նոր մղում ու թափ սառացան XVII դարի վերջին: Դա մասամբ հետևանք էր այն բանի, որ 1693 թ. Ջմյուտնիայի մոտ տեղի ունեցած ծովային ճակատամարտում ֆրանսիացիները ջախջախիչ պարտության մատնեցին Անգլիային ու Հոլանդիային: Լեվանտում գործող այս երկու պետությունների առևտրական նավատորմի խորտակվեց և նշանակալիորեն տկարացավ: Այսուհետև միառժամանակ արեւելեյան միջերկրածովյան ավազանում դրությամբ տեղի դառնում էին ֆրանսիացիները: Անտարակույս, այս հանգամանքը դրական ներգործություն էր ունենալու հայ-ֆրանսիական առևտրատնտեսական հարաբերությունների վրա, որը հաջողությամբ շարունակվեց նաև հաջորդ XVIII դարում:

Արևմտյան Եվրոպայում միջազգային առևտրով զբաղվող հայ վաճառականների խոշորագույն առևտրական պարտնյորներից մեկն էր նաև Հոլանդիան, որը Եվրոպայում առաջին երկիրն էր, որտեղ իրագործվեց հաղթական բուրժուական հեղափոխություն և ստեղծվեց պատմության մեջ առաջին բուրժուական հանրապետությունը: Հեղափոխությունից հետո ընդամենը մի քանի տասնամյակում Հոլանդիան իր զարգացմամբ առաջ անցավ Եվրոպական մյուս պետություններից: Այստեղ հատկապես նկատվում էր վաճառականական կապիտալի արագ զարգացում:

Հոլանդիայի և Ֆլանդրիայի (Բելգիա) Ամստերդամ և Բրյուս (Բրյուսսել) քաղաքներում հայ վաճառականները հաստատվել են դեռ շատ վաղ ժամանակներից⁷⁰: XVI դարում հայերի գալուստը Ամստերդամ առաջին անգամ հիշատակվում է 1560—1565 թթ.: Նրանք այդ քաղաքն էին այցելել իրենց բերած մարգարիտներն ու ադամանդները վաճառելու և տեղում հոլանդական ապրանքներ ձեռք բերելու և Լեանտի նավահանգիստները արտահանելու համար⁷¹: XVII դարի սկզբներից հայերը սկսում են կանոնավոր երթևեկություն Ամստերդամի հետ, որն արդեն առաջատար տեղ էր գրավել համաշխարհային առևտրի մեջ:

Առաջին անգամ այդ քաղաքում հաստատվածները, բնականաբար, անծանոթ էին տեղական լեզվին, վարք ու բարքին և այլն, ուստի ստիպված էին միջնորդ-թարգմանի օգնության դիմել: Այս դերը կատարել են նրանցից առաջ եկած մի քանի հրեաներ, որոնք տիրապետել են արևելյան լեզուների: Բայց ահա քիչ ավելի ուշ նիդերլանդներ եկած հայ վաճառականների մասին հոլանդացի պատմագիրներից մեկը վկայում է, թե «նրանց մեծ մասը կրթված մարդիկ էին և իրենց մայրենի լեզու հայերենից զատ խոսում էին նաև իտալերեն և ֆրանսերեն: Մրանք այս լեզուներով էին գործ տեսնում հոլանդացիների հետ»⁷²:

Հենվելով Ամստերդամի քաղաքային արխիվների փաստաթղթերի վրա, Հոլանդիայի հայ գաղութի պատմությունն ուսումնասիրած Առաքել Սարուխանը տեղեկություններ է հաղորդում այն մասին, որ 1617 թ. սկսած հայ վաճառականները Ամստերդամի քաղաքային բորսայում կատարում էին խոշոր առևտրական գործարքներ: Այդ քաղաքում նրանք հանգեցել են նաև իրենց հատուկ շուկան, որը կոչվել է «Արևելյան շուկա» (Ooster market)⁷³: Հայ վաճառականները հոլանդացիների հետ կազմել են նաև փայտիտրական սկզբունքների վրա հիմնված առևտրական ընկերություններ: Նրանք ունեցել են նաև զուտ հայկական առևտրական տներ, որոնց թիվը միայն Ամստերդամում 1660-ական թթ. հասնում էր 60-ի⁷⁴: Հոլանդիայում հայերի առևտրի ծավալ-

⁷⁰ Առաջին Սարուխան. Հոլանդիան և հայերը ԺԶ—ԺԹ դարերում. Վիեննա, 1926, էջ 10, 11:

⁷¹ Նույն տեղում, էջ 45, 46:

⁷² Նույն տեղում, էջ 50, 51:

⁷³ Նույն տեղում, էջ 47, 48:

⁷⁴ Fr. Macier. Quatre Conférences sur l'Arménie et les Arméniens Faites en Hollande. Paris, 1932, p. 251.

մանը մեծապես նպաստել է այն, որ նրանք այդ երկրում վայելել են թե՛ առևտրական և թե՛ կրոնական ազատություն։ Մինչ տեղական իշխանությունները հայերից առաջ Ամստերդամ եկած հրեաներին մերժում էին «Ամստերդամի րադաքացիության» իրավունքը, հայերին իսկույն շնորհվում են այդ կոշումն ու դրա հետ կապված իրավունքները⁷⁵։

Հայ-հոլանդական առևտրի այս աշխուժացման շրջանում մեծանում է նաև Ամստերդամի հայ գաղթօջախը։ Այն վաճառականները, որոնք այստեղ հաջողություն էին ունենում, բերում էին իրենց ընտանիքները և մշտական բնակություն հաստատում։

Հոլանդական իշխանությունների այս բարյալացված վերաբերմունքը հայ վաճառականների նկատմամբ պետք է բացատրել նրանով, որ նախ իսպանական լծից ազատագրվելուց հետո (1603 թ. իսպանիան դե-ֆակտո ճանաչեց Հոլանդիայի հանրապետության անկախությունը) Նիդերլանդները սկսել էին բուռն զարգացում ապրել։ Նրա մանուֆակտուրաները, որոնք կտորեղեն էին մատակարարում համարյա բոլոր եվրոպական երկրներին, կարիք ունեին մեծ քանակությամբ հումքի (մետաքս, բուրդ, բամբակ, ներկեր և այլն), որոնց մի զգալի մասը Հոլանդիան ձեռք էր բերում հայ և հույն վաճառականներից⁷⁶։ Այնուհետև, Հոլանդիայի հետ առևտուր անող հայ վաճառականները իրականացնում էին նաև Նիդերլանդների ու եվրոպական մյուս երկրների միջև լայն առևտրափոխանակություն, որը նպաստավոր էր Հոլանդիայի պետական գանձարանի համար։ Իտալիայի Լիվոռնո քաղաքի թանգարանում հայտնաբերված է 1627 թ. նոյեմբերի 21 թվակիր, հոլանդերեն գրված մի պայմանագիր, որտեղ ասվում է, որ Ամստերդամի վեց հայ վաճառական պայմանավորվում են ժան Ստիլին անունով հոլանդացի մի նավապետի հետ, որ սա Ամստերդամից նրանց ապրանքը տեղափոխի Լիվոռնո։ Փաստաթղթում ստորագրությունների տեղ դրված են վաճառականների անվանական կնիքները, որոնց վրա կարդացվում են՝ Սարհադ, Ջաքար, Օհան, Մարկոս, Պետրոս և Հովակիմ⁷⁷։

Վենետիկում, Լիվոռնոյում, Մարսելում, իսպանիայի քաղաքներում և այլուր գտնվող հայ վաճառականների առևտրական տները կամ նրանց ճյուղերը Հոլանդիայից ստանում էին կամ այդ երկիրն էին ուղարկում մեծ քանակությամբ ապրանքներ։ Այլ կերպ ասած, Նիդերլանդները հայ վաճառականների համար հանդիսանում էին նաև փոխաբեռնման հենակետ ողջ եվրոպական առևտրի համար։ Այստեղից խոջաները նավերով ապրանքներ էին առաքում նաև դեպի հյուսիս, բալթյան ծովեզրյա քաղաքներն ու այնտեղից ստանում էին ուրիշ ապրանքներ, առանձնապես սաթ, որը մեծ հարգ ուներ Ջմյուռնիայի շուկայում⁷⁸։

Հայ-հոլանդական առևտրական կապիտալի համագործակցությունը առավել լայն չափեր ձեռք բերեց XVII դարի 30-ական թթ. սկսած⁷⁹։ Նախ դա պայմանավորված էր նրանով, որ 1623 թ. «Հոլանդական արևելա-հնդկական ընկերությունը» Իրանի հետ կնքեց առևտրական պայմանագիր, որն անշուշտ մեծապես խթանելու էր նաև Նիդերլանդների հետ իրանահայ վաճառականների առևտուրը, որոնք այդ ժամանակ ըստ էության իրենց ձեռքում էին կենտրոնացրել Սեֆյան պետության արտաքին առևտրի մենաշնորհը։ Վերջապես, հայ-հոլանդական առևտրական հարաբերությունների ծավալման համար

⁷⁵ Ա. Սարգսյան. նշվ. աշխ., էջ 147։

⁷⁶ H. W a t j e n. Die Niederländer im Mittelmeergebiet zur Zeit ihrer höchsten Machtstellung Abhande Z. Verkehrs und Seegeschichte. Bd. 2, Berlin, 1909, s. 134.

⁷⁷ Bronnen tot de geschiedenis van den Levantschen Handel, 1590—1660. Dr. K. Heeringa. S'Gravenhage, 1910, s. 96. (մեջբերված է ըստ՝ Ա. Սարգսյան. նշվ. աշխ., էջ 9)։

⁷⁸ Ա. Սարգսյան. նշվ. աշխ., էջ 55։

⁷⁹ H. D u n l o p. Source pour servir a l'histoire de la compagnie des Indes Orientales et la Hay. 1930, p. 74.

կարևոր նշանակություն ունեցավ առհասարակ Մերձավոր Արևելքում Նիդերլանդների քաղաքականության ակտիվացման մեծացումը: Հենվելով 1598 և 1612 թթ. Օսմանյան կայսրության հետ կնքած կապիտուլյացիաների վրա, Հոլանդիան Մերձավոր Արևելքում աստիճանաբար ընդարձակում էր իր առևտուրը: 1617 թ. Միջերկրական ծովում հայտնվեց հոլանդական ռազմական նավատորմը, առաջին նավատորմը մի պետության, որը տեղավորված էր միջերկրածովյան ավազանում⁸⁰: Բուլդոլին իզուր անգլիական դեսպանը կոչ էր անում սուլթանին «աջակցել հին բարեկամներին, փոխանակ փնտրելու նորերը»:

1625 թ. Ամստերդամում ստեղծվել էր մի հատուկ հաստատություն՝ «Մերձավոր Արևելքի առևտրի և Միջերկրական ծովում նավագնացության վարչություն» անունով, որի խնդիրն էր աշխուրջ կերպով հսկել Միջերկրական ծովում կատարվող միջազգային կապերի վրա և իրականացնել առևտուրը Մերձավոր Արևելքի երկրների հետ⁸¹: Արդեն XVII դարի կեսերին Հոլանդիան դարձավ կենտրոնական և հյուսիսային Եվրոպայի ապրանքների հիմնական մատակարարողը լեանտի շուկաներին⁸²: Միաժամանակ հոլանդական նավերի էժան նավափոխադրավարձը նպաստում էր նրանց ավելի լայն օգտագործմանը արևելյան միջերկրածովյան շրջանում: Բանը հասնում էր նույնիսկ նրան, որ երբեմն լեանտյան ապրանքները լոնդոն էին բերվում հոլանդական նավերով⁸³: Այս բոլորի հետևանքով XVII դարի կեսին լեանտյան առևտրում Անգլիայից հետո Հոլանդիան դուրս եկավ երկրորդ տեղը:

Հոլանդացիները հակված էին համագործակցել հայ վաճառականների հետ ոչ միայն արևելյան ապրանքներ ձեռք բերելու, այլև իրենց մրցակիցների՝ անգլիացիների ու ֆրանսիացիների դեմ հաջողությամբ պայքարելու համար: Նիդերլանդները խիստ շահագրգռված էին հայ վաճառականների եվրոպական առևտրով նաև այն պատճառով, որ նրանք իրենց ապրանքները լեանտյան նավահանգիստներից Միջերկրական ծովով եվրոպական երկրներ էին տեղափոխում առավելապես հոլանդական նավերով: Ուշագրավ տեղեկություններ կան նաև այն մասին, որ հայերն ունեցել են նավեր, որոնք երթևեկել են լեանտի և Նիդերլանդական նավահանգիստների միջև հոլանդական դրոշի ներքո⁸⁴:

Ինչպես հայտնի է, անգլո-հոլանդական մրցակցությունը համաշխարհային ծովային ուղիների վրա XVII դարի կեսերին հանգեցրեց պատերազմի, որն ավարտվեց Հոլանդիայի պարտությամբ: Նիդերլանդների ռազմական և քաղաքական հզորությունը թուլացավ, նրանք կորցրին մի շարք գաղութներ և դուրս մղվեցին ծովային առևտրից: Սահմանափակվեց նաև նրանց առևտուրը Մերձավոր Արևելքի երկրների հետ: Բնական է, որ այդ պայմաններում Հոլանդիայի համար կենսական նշանակություն էր ձեռք բերում համագործակցությունը հայ վաճառականների հետ: Պատահական չէ, որ ողջ XVII դարի երկրորդ կեսի ընթացքում Նիդերլանդների կառավարությունը պարբերաբար արտոնություններ էր հատկացնում հայ վաճառականներին⁸⁵:

Իրենց ապրանքների վաճառքի համար շահավետ շուկաներ ձեռք բերելու որոնումների ժամանակ հայ վաճառականները Միջերկրական ծովի ճանապարհով թափանցում էին նաև Արևմտյան Եվրոպայի այլ երկրներ՝ Իսպա-

⁸⁰ P. Pringle. Jolly Roger. New York, 1953, p. 55.

⁸¹ Ա. Մարտիսան. նշվ. աշխ., էջ 14:

⁸² H. Gastries. Les sources inédites de l'histoire du Maroc. T. 3, Paris, 1912, p. 40.

⁸³ W. Monson. The Naval Tracts. London, 1902—1914, v. 3, p. 443.

⁸⁴ Ա. Մարտիսան. նշվ. աշխ., էջ 56—57:

⁸⁵ Kr. Glammann. Dutch-Asiatic trade 1620—1770. Copenhagen—The Hague, 1958.

նիա, Պորտուգալիա, Անգլիա, Գերմանիա, Դանիա, սկանդինավյան երկրներ և այլն⁸⁶:

Հալ վաճառականների կողմից Եվրոպա արտահանվող ապրանքների տեսականին չափազանց հարուստ էր: Իհարկե, առաջնությունը պատկանում էր հում մետաքսին: Բայց և կարևոր տեղ էին գրավում նաև հետևյալ ապրանքները. ուղտի, ոչխարի և այծի բուրդ, դամասկոսյան դիպակներ, գոհարեղեն, ղանազան համեմունքներ, մոմեր, մետաքսյա և բրդյա կտորեղեն, զառնավուխտ, թավիշ, գլխոտոր, խաշնդեղ, բուսախեթ, գորգեր, կաշվեղեն (մասնավորապես շագրենի), հաշիշ, պիստակ, սաֆյան, լեղակ, մորթեղեն, հնդկական մուշկ, րամբակ, մեղրամոմ, մարգարիտ, մարջան, օժանելիքներ, գինի, լաշվարդ, ուղանաներկ, ինդիգո, դժոխաքար, համպար, խոնկ, չորացրած և աղած ձուկ, ոսկի և արծաթ, արմավ, ծխախոտ, պաղլեղ, շաքար, զաֆրան, խավար-ծիլ, մեղր, բրինձ, անուշադր և այլ բազմապիսի ապրանքներ⁸⁷: Տեղեկություններ կան նաև, որ սուրճի գործածությունը Եվրոպայում տարածել են առաջին հերթին հալ վաճառականները⁸⁸:

Եվրոպական ալյուսիլ երկրներից հալ խոշաները Արևելք են ներմուծել գլխավորապես հոլանդական, անգլիական, գերմանական, ֆրանսիական մահուդ, թավիշ, բրդյա կտորներ, մետաքս գունազարդ գործվածքեղեն (կամկա), բաֆթա, զմուռս, սնդիկ, սաթ, արջասպ, խրուկաներկ, զանազան կահավարասիք, զենք, ասեղներ, երկաթյա ապրանքներ, կապար, խաղաթղթեր, զանազան զարդեր, ապակի, թուղթ, բուստ, վենետիկյան հայելիներ, կտավ, ներկեր, մանյակներ, կաշվե իրեր, ժամացույցներ, մկրատներ, դանակներ, օճառ, ակնոցներ, արհեստական մարգարիտ, ուլունքներ, պերճանքի առարկաներ և եվրոպական արտադրության ալյուսիլ բազմապիսի ապրանքներ⁸⁹:

Անգլիացի ճանապարհորդ Նիլ Պորտերը նշում է, որ հալ վաճառականները հանդիսանում էին Եվրոպայի և Ասիայի միջև ոսկու և թանկարժեք ապրանքների տեղափոխման լավագույն միջնորդներ: Եվրոպայից բերած ոսկե դրամները վերադրոշմելով իրանական դրամի, ջուղայեցի վաճառականներն, օրինակ, ստանում էին հսկայական շահույթներ, որոնք կիսում էին Սեֆյան շահերի հետ:

Արևելքի երկրներում Եվրոպայի կապիտալիստական արտադրության բնագավառում ստեղծված նոր ապրանքների տարածման հետ մեկտեղ, չափազանց մեծ է եղել հալ վաճառականների դերը նաև Արևելքի տարբեր երկրներում եվրոպական մշակույթի արժեքների տարածման բնագավառում: Հայտնի է, օրինակ, որ նրանց միջոցով են Արևելք թափանցել Եվրոպայում հրատարակված առաջին գրքերը, եվրոպական նկարչության, թատրոնի և արվեստի ալյուսիլ բնագավառների նորույթները և այլն:

⁸⁶ Տե՛ս, օրինակ, Ռ. Վ. Կյուլպենկյան. Հայ-պորտուգալական հարաբերություններ. Երևան, 1986; R. Gulbenkian. Les relations entre l'Arménie et le Portugal du moyen age au 10^e siècle.—Revue des études arméniennes, Paris, 1980, t. 14, p. 171—213; A History of Oriental Rugs before 1600. London, 1896; K. Bayany. Les relations de l'Iran avec l'Europe occidentale a l'époque Safavide, Portugal, Espagne, Angleterre, Holland et France (avec le document inédit). Paris, 1937.

⁸⁷ Մաշտոցի անվ. Մատենադարան, ձեռ. № 8443, ք. 36—91: Ղ. Ալիշան. Սիսական, էջ 445, 446:

⁸⁸ Жаклин Пирен. Открытие Аравии, пять веков путешествий и исследований, М., 1970, с. 76.

⁸⁹ Pitton de Tournefort. Op. cit., t. 2, Lettre 20, p. 159; J. B. Tavernier. Les six voyages de Jean Baptiste Tavernier en Turquie, en Perse et aux Indes. Paris, 1692, p. 47.

Այսպիսով, ուշ միջնադարում համաշխարհային առևտրի ընդգավառում հանդես գալով որպես եռանգուն ու գործուն մասնակիցներ, չափ առևտրական-րործուսողիան կարևոր դեր է խաղացել Միջերկրական ծովով իրագործվող Արևելք-Արևմուտք համաշխարհային ապրանքաշրջանառության մեջ:

СРЕДИЗЕМНОМОРСКИЙ ТОРГОВЫЙ ПУТЬ И ТОРГОВЛЯ АРМЯНСКИХ КУПЦОВ СО СТРАНАМИ ЗАПАДНОЙ ЕВРОПЫ В XVII ВЕКЕ

Доктор ист. наук В. А. БАЛБЕРТЯН

Р е з ю м е

Несмотря на то, что после великих географических открытий торговые пути через Средиземное море переместились на Атлантический, Индийский, а потом и Тихий океаны, в результате чего Левант потерял свою торговую монополию, однако и в дальнейшем, в частности в период позднего средневековья, главные пути восточной торговли на Запад опять же проходили через Средиземное море. Это объясняется в первую очередь тем, что путь из любой европейской страны через Средиземное море на Ближний Восток был намного короче и безопаснее, чем через океан. Армянские купцы, занимающиеся в основном сухопутной караванной торговлей, в XVIII в. в обширных масштабах переключились также на морскую торговлю через Средиземное море, играя важную роль в международном обмене между Востоком и Западом.